

یاسین بسل ناشاعری نادر وشم

ناصر بلوچ

ایم فل اسکالر، شعبہ براہوئی جامعہ بلوچستان، کوئٹہ

ڈاکٹر وحید رزاق

اسسٹنٹ پروفیسر، جامعہ بلوچستان، کوئٹہ

Abstract

Yaseen Bismil is one of the renowned poets with a unique diction in Brahui as well as in Balochi poetry. Five books of his poetry have been published by different Academies in Brahui. Bismil illustrated the social issues and the grievances of the needy and destitute people in his poetry. In his Balochi poetry, he has covered the themes like troubles of society, love and affection, countenance and complexion, grief and grievances. In this paper all aspects of Bismil's poetry will be focused to demonstrate the diction of his poetry.

Keywords : Yaseen Bismil, Brahui poet, Diction, social issues

براہوئی زبان اٹ منہ شاعر اس ہندن ہم اریر، ہرافتے نن 'فل ٹائم شاعر' پانگ کینہ، اوفتیاں اسٹ اس یاسین بسل ء ہم پاننگک۔ بسل ناچ آزند شاعری نادا پاراپار آن تدینگا۔ یاسین بسل فیض محمد ناراٹی کوئٹہ کوئٹہ وڈی مس۔ اونا شاعری ٹی بے کچ لانخی تادرشانی خننگک۔ داوخت اسکان یاسین بسل نابراہوئی ٹی پنج شعری مجموعہ شینک مسنو۔ ہرافتے ٹی اولیکو شعری مجموعہ "گیاوان نا پھل"، ء کہ داکتاب 1992 ء ٹی براہوئی ادبی سوسائٹی ناکنڈ آن شینک مس۔ اوکان پداوقتا یلو کتاب "نازبو"، ہم ہندا سال یعنی 1992 ء ٹی براہوئی اکیڈمی پاکستان نابندوبست اٹ شینک مس۔ داکتاب چار بندی تا مجموعہ اسے۔ ولدا اونا کتاب "ٹلو جان"، 1998 ء ٹی شینک مس۔ داکتاب ء ہم براہوئی ادبی سوسائٹی پاکستان شینک کرے۔ داکتاب اٹ شینک مروک آنظم آک چنا

تے کن نوشتہ کننگانو۔ 2002ء ٹی اونا شعری مجموعہ اس ”دیوان بسمل“ ناپن اٹ براہوئی اکیڈمی پاکستان ناپارہ غان شینک مس۔ اوکان پدولدا براہوئی اکیڈمی پاکستان ناکنڈ آن اونا سہ پین شعری مجموعہ اس ”دوخواز“ ناپن اٹ 2005ء شینک مس۔ بسمل بلوچی ٹی ہم شعری کرینے۔ اونا بلوچی شعری ناکتاب ”ہون ٲارس“ 2007ء ٹی بلوچی اکیڈمی ناپارہ غان شینک مسے۔

یاسین بسمل نابارواٹ براہوئی شعری ناجاچ ٲہلوک آتا کنڈ آن ہم گچین ٲ خیال مونی بسنو، وافتارداٹ بسمل اسہ گچین ٲ شعرا سے، دن کہ جو ہر براہوئی نوشتہ کیک کہ ”براہوئی شعری نابارواٹ بچ ٲ جائزہ اس کنا نظر آن گدرینگتنے۔ اگہ آہا تو اینو براہوئی شعری نامعیار ناجبٹ مون آبروس۔ ہندا معیار نئے بیر فن عروض (بدیع) مگر تخیلی استعارہ وترکیب نابارواٹ مرے ہمو براہوئی شعری نا گچین آمعیار ناسہ شاعر اس یاسین بسمل ٲ پانگ کینے“۔ (براہوئی 2002: 91) جو ہر براہوئی چونکہ سندھ انارینکوک اسے، ہندا سوب آن اونا لوز وستر آتا ہاٹی سندھی ناوڑ ٲ، او یاسین بسمل نابارواٹ انت پانگ خواہسنے، اونا اگہ وضاحت مرے، تو او پانک کہ یاسین بسمل براہوئی زبان ناہمو شاعر آتیاں ٲ، ہرانا شعری فن عروض تون ہم گرچ وگنڈوک ٲ۔ او پانک کہ بسمل نا شعری ٹی ترکیب و استعارہ غاک ہم بھاز گچینی اٹ و آب اٹ مونی اتگانو، ون پانگ کینے کہ بسمل براہوئی زبان نا گچین انگا شاعر آتیاں اسٹ اسے۔

عبدالجبار یار بسمل نابابت نوشتہ کیک کہ ”یاسین بسمل نا شعری تینا اسہ جتا ٲ شعری اسے۔ داشاعری ٹی زنداناویل آک غریبی نزوری و حسن عشق نامونہ غاک اریر۔ دانی بچ شک اف کہ یاسین بسمل اسہ ہندن ٲ شعرا سے کہ اونا شعری ٹی عاشق نا غریبی نزوری نا بھلوڈ کراس ارے۔ داشاعری ٹی یکا محبوب بڑزو عاشق بھاز غریب و بے واک ارے“ (یار، 2002، 4) تھین اٹ بسمل نازند ہراوڑ تدینگانے، تو او تینا زندانا آدینک ٲ مون آیسنے، او تینٹ بے وس نس، تو اونا شعری ٹی ہم ہندا بے وی نادرک خننگ۔ ولدا ہرازند ٲ او خناس، و ہندن او تینا دا پارا پارا آن ہراچا گڑد ٲ خنا کہ تو او، اوڑان بھاز جتا نس۔ اونا بے وی و اونا کیب انا بندغ آتا آسراتیک تھین اٹ اودے بھفنگ آبیوس کریرہ۔ و ہندا بھفنگ آتیاں پددا خیال آک اونا لوز آتینی بدل مسرہ، ہراڑان اونا نزوری و محبوب یاچا گڑدنا

حسن زیبائی و آسرا تیک مونی بسرہ۔

یاسین بسمل نئے بیرہ براہوئی ٹی شاعری کر یکہ بلکن براہوئی تون اور بلوچی زبان ٹی شاعری کر یکہ اودا ہڑتوم آ زبان تا اسہ غزل گوشا عراس نس۔ اونا شاعری ٹی درد، سوز و گداز، مہرانا کلہوتون اور ایلوشعری وزن ناگل پہلوک ساڑی نسر۔ ہندا وڑاٹ اونا شاعری ٹی موسیقیت، رومانس تون اور ادبی ہنیتی کچ آن زیات ساڑی نس۔ اوتینا شاعری ٹی مہر و مرہیت تون اور اوار غم و خوشی، راج انا ویل آتا درشانی، راج و جوان انگا کسراٹ راہی روان مننگ نا سنج تسکہ۔ ہندا سوب آن اونا شاعری ہر ہمو بندغ نا اُست اٹی جاگہ کروک و ہرا کہ اسہ وارا اس اونا شاعری و خوانانے۔

یاسین بسمل تینا شاعری ٹی دڑ دوڈکھ، ویل آتے بیان کرینے، دُن کہ:

”دا بمباتے بارودے تقو کہ کس
اراکان ارارے زمانہ ہنا
ہمو دشمن و نا کہ نا جان اس“

(بسمل، 2002، 60)

دا شاعری ٹی شاعر پارینے کہ اسہ ہندن و وخت اس نس کہ ہرا ٹی نن اسل امن ایمنی ٹی رہینگانہ۔ ولے داسہ ہرا وخت کہ سائنس و ٹیکنالوجی شونداری خناتو داڑتون اور بمب و بارود آک بٹر، امن ایمنی ہنا چٹا، ہرا اسہ بندغ اسٹ ایلونا دشمن جوڑ مس۔

یاسین بسمل نا شاعری ٹی پنت و شون ہم ارے، دُن کہ:

”جوان تینے چاس اگر
جوانیٹ نی پیش بر
ہر اسٹ تو مہر مابت دوستی
پہمہ مہ کہ ہندا دے جوانگا کسر
در گزر کنگ جوانو ہیٹ سے
چاسہ دا پیتے کنا نی بے خبر

بے سہائی لا تمنائی جوان اف
توبہ کر مغرور یان نی توبہ کر
پین نا تکلیف ے تینا بلکہ نی
زیبدارا زندے کپہ بے اثر“

(بسل، 2005ء، 77)

شاعر تینا شاعری ٹی مہر و مہر بیت ناکلہوتر سا پانک کہ بندغ آن ہراڑسکان کہ مر یک محبت نا کلہو ے سر کے۔ مہر و مہر بیت کن الہی ے کہ بندغ تینا اخلاق ے جوان کے، ایلو بندغ آتے تون جوان ے سلوک تنخ، جوان ے رویہ اسیٹ پیش برے۔ بندغ کن بے سہائی۔ لا تمنائی جوان ے گڑاس اف۔ انتے کہ بندغ مش آن ودی مسنے ولد امش اٹی کا ہک۔ ہندا خاطر آن انسان ناداشان اف کہ او غر و تکبر اٹ زند ے تیر کے۔ بلکہ عاجزی و انکساری اٹ تین زند ے تدیفے تا کہ سر سہی دوئی مرے۔ شاعر پانک کہ انسان کن الہی ے کہ او ایلو فتا تکلیف ے پین نا تکلیف سر پند مف بلکہ تکلیف ے تینا تکلیف خیال کے۔ ہندا کان اونا زند جوان و زیبدار مر یک۔

اسہ پین غزل سے نے منہ بندائی پانک:

”مروے جوڑ نا قسمت
کہ تمینٹ کیس نی ہمت
بفک کاریم ٹی شہرت
اگر کپیس نی محنت
سنا کر نیک نیت مر
اصل مفروس بے پت“

(بسل، 2002ء، 25)

یاسین بسمل تینا شاعری ٹی محنت و ہمت ناکلہوتر سا پانک کہ انسان ے بیرہ تینا قسمت آسیبو کروئی تولوئی اف بلکہ انسان تینا قسمت ے تینا محنت اٹ جوان جوڑ کنگ کیک۔ بلکہ داڑ کن نیک نیتی

شرطی۔ ہراوخت کہ انسان نیک نیتی اٹ ہمت کیک، محنت کیک گڑا سُل او بے پت مفک۔
 یاسین بسمل ناشاعری ٹی خیال آتا کڑمبی، شاہتی ہم تینا مٹ تینٹی دُن کہ اونا دا غزل:

”اُخہ نازٹ توار کیک کنے
 غم تیان بے چکار کیک کنے
 مخیسہ کہ بریک او مونا
 پھل و گلشن بہار کیک کنے
 دیوہ یادان ہر غم ء تینا
 او گنوی تو سار کیک کنے
 کنتو سنگت مریک ہرا وختا
 اخدر زیہدار کیک کنے
 ہیٹ کنتون کیک نازٹ او
 مہر سے مہردار کیک کنے“

(بسمل، 2002، 121)

امر کہ پانگا یاسین بسمل ناشاعری ٹی کڑمبی ارے۔ ہندن او تینا شاعری ٹی دا ہیٹ ء پک
 کرینے۔ بڑز نوشتہ مروک آشعر آتے ٹی اونا احساس آک پاش خنکڑہ کہ تینا محبوب نابارواٹ پانک
 کہ کنا محبوب ہراوخت نازاٹ کنے توار کیک تو ای مچ آغم تے آن بے غم مریوہ۔ تینے ہندا خیال کیوہ
 کہ ای پھل و گلشن تاباغ سے ٹی اُٹ۔

ایلو دا غزل خوانگ نالائخ ء۔ یاسین بسمل بھلار دیف آتے ٹی ہم بھاز جوان شاعری کرینے، دُن کہ:

”لگپ خدا کے کسے دا عشق نا مرض
 گم گار کیک چسے دا عشق نا مرض
 ہچ تمپک سما کہ ہُشک بندغ ء امر
 لکک کس کسے دا عشق نا مرض“

(بسل، 2002ء، 67)

شاعر پانک کہ ہر اوخت کہ انسان ناعشق نا بیماری لگا تو ہندن چا کہ او نازندا جس گم گارس
ہنا۔ عشق انسان ہمشک کا ہک ولے انسان ہما تمپک کہ اوڑتون انت مننگ ٹیہی؟
اسہ پین غزل سے ٹی داوڑ ردیف ہ استعمال کرینے:

خن تیان نی مَر مریہ جانان خدا حافظ
استان مَر مریہ جانان خدا حافظ

(بسل، 2002ء، 70)

شاعر تینا محبوب ہ پانک کہ داسہ نی کاسہ کناخن تے آن مَر مریہ نا خدا حافظ۔ ولدا پانک
کہ اے کنا محبوب نی اخدر کہ کناخن تے آن مَر مریس ولے کنا اُست آن اُسل مَر مریہ۔ ای نے
چچ وڑا سے اٹ گیرام کنگ کپرہ۔

یاسین بسل نا چار بندیک ہم تینا مٹ مینٹ ء۔ دُن کہ دارا چار بندی شامل کنگرہ:

”نقاب ء مچٹ کس ریفیہ جوان اس
نا اُستے ذرس ریفیہ جوان اس
نن ہم نا عشق ء نا ظالم خلوکن
نن کس عفتون گدریفیہ جوان اس“

(بسل، 1992ء، 8)

شاعر تینا محبوب ہ پانک کہ نی ہندا خس تو کرک کہ مچٹ اس تینا مون آن نقاب ہ عرف۔
انتے کہ نن ناعشق انا خلوک اُن۔ مچٹ تو ننا اُست ہ ریف۔
ارٹمیکو چار بندی:

”دوینگاٹ پٹاٹ ہر پارہ غا
کنے ملتو دڑد غم تا دوا
خوینکی آخن تا قسم زیب ء نا

تخنگانے خاخر کنا رغ رغ آ

(بسل، 1992ء، 13)

شاعر پانک کہ ای تینا ہر پارہ غاگوئی کریٹ تینا محبوب ۽ پٹاٹ ولے اونا ڈس کنے ملتو۔
ولے ای امر کیو کہ اوکنا غم تادو ادا رو ۽۔ اونا جتائی ٹی کنا است، خاخر آ نبار ہشتنگ۔
ہندن او فتا چناتے کن نوشتہ کروک آنظم آتے ٹی ہم بھلو چس اس ارے۔ دُن کہ ”پشی و ہل“
نا عنوان اٹ نوشتہ کیک:

”پشی اس پارے ہل ۽ سگت مرین
پیش تم کشون بر چکر خلین
ای تو دا کاریم ۽ ہلانٹ اسل
باودی ۽ تینا سلانٹ اسل
اف کنے سگت ای حیرانٹ اسل
اسٹہ گندہ ولے جوانٹ اسل
بر کہ کہ ہڑتوماک دو پہ دو ٹی ہلین
پارے اودے ہل نی چالاخس امر
پیش تماٹ پیشن آ ای ہم اگر
نہ سلیوہ ای و نہ است و جغر
جوانیٹ ای چاوہ نے او بے خبر
نے کونگا تون امر سگت مرین“

(بسل، 1998ء، 12)

یاسین بسل چناتے تون مخاطب مرسا او فتنے ہل و پشی ناقصہ ۽ بنفک کہ اسہ پشی اس ہل اسے
سگت مننگ ناسلہ خلک۔ ولے ہل تو چاہسکہ کہ پشی کنا دشمن ۽ او مرکن تون سگت مرین۔ ضرور دائی
گڑ اس ارے۔ ولے پشی اونا است ۽ ہلنگ کن بھاز ہیلہ و بہانہ کریکہ کہ ای امر مہالوئسٹ داسہ

ہمون اف۔ ای تینا مست انا عادت یعنی ظلم و الاٹ۔ ولے ہل ہم ہشارئس، ہشاری آن کاریم ہلسا
پارے کہ نی تو بھاز ہشاراُس ولے ای چا وہ کہ پیشن پیش تماٹ کنا سوتے آن گچ اس ہم ہچپک۔
یاسین ہسل نابلوچی شاعری ٹی ہم بھاز کڑمی ارے۔ مثال کن اوقنا بلوچی شاعری ناداغزل:

بے قراران بے قراران چون کنان
دردواران دردواران چون کنان
روچ وشپ فریاد ء کنتین دل منی
آتکہ گین وشین بہاران چون کنان
پیش واران من کیا درد و غمان
گو غمو دردان اواران چون کنان
زیروارن پر ہما روچان دل
نشہ گان من انتظاران چون کنان
نین رژنا نو منی ذردے تہا
چے دل ء گلا ہساران چون کنان
کے نہ زانیت بے وسیں ہسل منان
کنت لکھ کسے ابرمن بے تواران چون کنان

(ہسل، 2007ء، 78)

یاسین ہسل براہوئی شاعری ٹی رومانیت ئس، ہمورومانویت بلوچی شاعری ٹی ہم ساڑی ء۔
تینا محبوب ء پانک کہ ای نے کن بھاز بے قراراٹ۔ حیران اٹ کہ نے آن بیدس امرکیو۔ ای ناجتائی
ٹی دے ون ہوغوہ فریاد کیوہ۔ پانک ای ہمیشہ نا انتظاراٹ تو لوک اٹ کسر آہر وہ کہ فی ہراتم بریسہ۔ کس
اس داتپک کہ ہسل اخہ دربیوس ء نامحبت نابلوچی اٹ اے۔ براہوئی نادے بے مسٹ آشا عیاسین ہسل
71 سال نا عمر ٹی 24 فروری 2011ء نادے آکزیت کرے۔

کھٹیا

یاسین بسمل براہوئی ادب نا اسہ جوان ء شاعر اس نس۔ داکان بیدس اوبلوچی ٹی ہم جوان شاعری کرینے۔ ہنگے تو بسمل ء براہوئی زبان ناہمو شاعری آتیاں پانگ مریک ہرا کہ تینا حساسیت ء تینا سر حال جوڑ کرینو۔ بسمل نئے بیرہ مہر و مریت ورومانویت نا تاثر مونی ایسنے، بلکن اوچناتے کن ہم شاعری کرینے، ودا شاعری ہم دن سادہ اف کہ چناتا وخت تیری مرے۔ دن کہ پشی وبل انا قصہ ء، اوٹی ظالم و مظلوم، محکوم و حاکم و ہندا وڑ اراجتا طبقہ غاتے نشان تنزگانے، وپانگانے کہ بڑا نا طبقہ مدام شیفکو طبقہ ء ریفک و تینا کاریم ء کشک۔ نن پانگ کینہ کہ بسمل نا شاعری بیرہ وخت تیری اس اف، و ہندن اونا شاعری ٹی فکر و خیال، شعریت، فن و فکر کل انا مثال آک رسینگرہ۔

کتاب آک

- بسمل، یاسین (2005) ”دو خوار“ براہوئی اکیڈمی کوئٹہ، ء
- بسمل، یاسین (2007) ”ہون ء ارس“ بلوچی اکیڈمی کوئٹہ، ء
- بسمل، یاسین (2005) ”دو خوار“ براہوئی اکیڈمی کوئٹہ، ء
- بسمل، یاسین، (1998) ”ٹلو جان“ براہوئی ادبی سوسائٹی کوئٹہ، ء
- بسمل، یاسین (2002) ”دیوان بسمل“ براہوئی اکیڈمی کوئٹہ، ء
- بسمل، یاسین (1992) ”ناز بو“ براہوئی اکیڈمی کوئٹہ، ء